



Sermon  
Kxf. Dr. Numlaajtsheb Yaaj

**“Tsis Txhob Ntshai”**

Secondth Sunday after Pentecost  
Our Savior Lutheran Church, Richville, MI  
6-22-14

Thov txoj koob txojmoov thiab txojkev kajsiaib lug pub rau sawvdaws los ntawm Vajtswv uas yog peb Leejtxiv uas yog peb tus Cawmseej Tswv Yexus Khetos. Asmees.

**Mathais10:28** “Do not be afraid of those who killed the body but cannot kill the soul. Rather, be afraid of the one who can destroy both soul and body in hell - *Nej tsis txhob ntshai tus uas tua tau nej lub cev, tiamsis tua tsis tau nej tus ntsujplig; nej yuavtsum ntshai Vajtswv tus uas muab tau nej lub cev thiab nej tus ntsujplig pov rau hauv ntujawg.*” ‘Nov yog tus Tswv Txojlus’ (Cross Reference – Yauj 37:24, Mathais 5:22, Lukas 12:5, Henplais 10:31, Yakanpaus 4:12)

Illustration “Afraid of dying” (Show Longcheng air field)



Nyob rau tebchaw nplog nyablaj tuaj tua Loojceeb lub tshav dav hlau. Loojceeb yog lub zos uas siv xovtooj nrog cov tubrog tom tshav rog sibtham, xa mostxwv thiab khoom mus pab rau cov tubrog. Loojceeb yog ib lub zos uas cov yeebncuab tuaj txeeb nyuaj kawg nkaus vim nws muaj tej roob los thaiv puag ncig lub zos. Thaum cov “Communist Vietnamese – nyablaj liab” tuaj tua Loojceeb xyoo 1971, (**Show afraid**)



thaum no kuv muaj 3 xyoo. Kuv hnov phom nrov thiab tej tshab dav hlau ya thiab pom tej roob ncho pas lug. Kuv tseem yog menyuum yaus xwb tiamsis kuv nco tias kuv ntshai tsam kuv tuag. Lub sijhawm no kuv txiv muaj cov tubrog saib xyua peb tsevneeg thiab coj peb mus khiav nkaum rau nram tus kwjdeg nyob ze ntawm peb lub tsev. Kuv txiv plhws kuv thiab hais rau kuv tias, “Tsis txhob ntshai.” Txawm kuv ntshai los ib pliag xwb tej suab phom ntawd ntsiag zujzus ces kuv txiv rov coj peb mus rau hauv tsev lawm. Xoxwm qhia haistias, cov yeebncuab kov tsis

yeej thiab lawv thim rov qab thiab Loojceeb rov yog lub tebchaw nplog li tsis yog poob rau nyablaj liab lawm. Txawm haistias kuv tseem me thiab tsis tau paub qabhau dabtsi los kuv yeej tseem ntshai tsam kuv raug kev tuag.

- I. Nyob rau peb Txojmoozoo hnuabno, Yexus qhia nws cov thwjtim txog txojkev tuag. Thaum Yexus xa lawv mus qhia Txojmoozoo, nws hais rau lawv haistias lawv yuav ntsib yeebncuab. (**Show Jesus talking to his disciples**)



Cov yeebncuab ntawd yuav muab lawv tua povtseg. Yexus thiaj li hais ntawm Vs. 22 tias, “You will be hated by everyone because of me – *koj yuav raug ntxub los ntawm txhuatus vim yog kuv.*” Txawm Yexus hais li no

los Yexus qhia kom lawv tsis txhob txhawj txog txojkev tuag. Vim tsis ntev xwb nws yuav raug txojkev tuag thiab nws yuav kovyeej txojkev tuag ntawd. Tus uas ntseeg nws yuav nrog nws koom txojkev kovyeej ntawm kev tuag thiab. Yog li ntawd Yexus thiaj li hais ntawm Txojmoozoo tias, “Do not be afraid of those who killed the body but cannot kill the soul. Rather, be afraid of the one who can destroy both soul and body in hell - *Nej tsis txhob ntshai tus uas tua tau nej lub cev, tiamsis tua tsis tau nej tus ntsujplig; nej yuavtsum ntshai Vajtswv tus uas muab tau nej lub cev thiab nej tus ntsujplig pov rau hauv ntujtawg.*” (Mathais 10:28) Qhov tseeb tiag Yexus hais kom lawv tsis txhob ntshai txog txojkev tuag.

Yexus npaj kom nws cov thwjtim totaub txog txojkev raug tsimtxom thiab tuag. Tsis ntev xwb cov thwjtim yuav pom Yexus raug ntes, tsimtxom thiab ntsia rau saum tus ntoo khaublig. Tomqab uas Yexus mus saum ntuj ceebtsheej lawm cov thwjtim los yuav raug tsimtxom thiab tuag rau txojkev qhia Txojmoozoo. Ua ibtug ntseeg Vajtswv nyob rau Yexus tiam mas nyuaj kawg nkaus. Tibneeg haistias kev ntseeg Vajtswv yog kev ntseeg cuav lawm. Cov Loos xav kom cov ntseeg yuavtsum ntseeg lawv tus vajtswv.

(Show sheep leading to be slaughter)



Yog cov ntseeg tsis hawm Loos tej vajtswv ces lawv tus vajtswv yuav rau txim rau haiv tibneeg Loos. Muaj ntuj qhuav losyog av qeeg ces lawv liam haistias yog tim cov ntseeg lawv lub tebchaw thiaj li raug kev tsis zoo. Lawv liam kom cia li muab cov ntseeg pov mus rau tsov tom. Yog li ntawd Paulus thiaj li sau haistias, “For your sake we face death all day long. We are considered as sheep to be slaughter – *vim yog nej peb niaj hnuv ntsib kev tuag. Peb zoo li tus yaj uas cab mus tua.*” (Loos 8:36)

Muaj ibtug niamtsev tau mob nyav heev. Nws muaj cancer thiab yam mob no kwv khomob kho tsis tau lawm. (Show child tying leave to tree)



Yog li ntawd nws tsua yog pws ntawm lub txaj ntawm lub tsev kho mob thiab tos txog hnuv uas nws tuag lawm xwb. Muaj ib hnuv tus kwv khomob los xyua nws, ces nws nug kwv khomob tias, “Kwv khomob, kuv tshuav txojtsia ntev npaum li cas nyob lawm xwb?” Tus kwv khomob cos taubhau thiab haistias, “Kuv ntshai tias thaum txog cov nploojntoos zeeg ces yog txog lub caij uas koj tuag lawm.” Tus niam tsev no tsis pom tias nws tus ntxhais muaj 8 xyoo nyob ntawm ib sab qhovrooj hnov cov lus


uas nkawd tham ntawd. Ibpliag leejniam xauj ntawm lub qhov rais mus rau nraum zoov nws quaj los kuasmuag vim nws pom nws tus ntxhais mus khaw cov nploojntoos los mus khi rau ntawm tsoobntoo kom cov nplooj tsis txhob zeeg. Tus ntxhais ua li no vim nws tsis xav kom cov nploojntoos zeeg, vim yog cov nploojntoos zeeg ces nws niam yuav tuag.

- II. Txojkev tuag yog ibyam uas tibneeg ntshai tshaj plaws. Zoo nkaus li tus me ntxhais uas muab cov nploojntoos rov los pav rau tsoob ntoo, peb tibneeg los yuav ua txhuayam tuav kom txojkev tuag tsis txhob raug rau tus uas peb hluab thiab tshua. (Show fear of death)




Tiamsis Yexus hais ntawm peb Txojmoozoo hnuvno txog txojkev uas tsis txhob ntshai txojkev tuag rau ntawm lub cev

tiamsis yuavtsum ntshai rau ntawm tus uas yuav tua tau lub cev thiab tus ntsujplig. Yexus haistias, “Do not be afraid of those who killed the body but cannot kill the soul. Rather, be afraid of the one who can destroy both soul and body in hell - *Nej tsis txhob ntshai tus uas tua tau nej lub cev, tiamsis tua tsis tau nej tus ntsujplig; nej yuavtsum ntshai Vajtswv tus uas muab tau nej lub cev thiab nej tus ntsujplig pov rau hauv ntujtawg.*” (Mathais 10:28) Txojmoozoo yog hais txog txojkev tuag ntawm sab nqaijtawv thiab kev tuag ntawm sab ntsujplig. Txoj kev tuag yog yuav raug cais ntawm ntuj ceebtsheej thiab ntawm ntujtawg teb? Koj yog tus ntseeg koj yuavtsum paub ntshai txog txojkev kom koj tsis txhob raug cais mus rau ntujtawg teb. Yexus thiaj li haistias, “Rather, be afraid of the one who can destroy both soul and body in hell - *nej yuavtsum ntshai Vajtswv tus uas muab tau nej lub cev thiab nej tus ntsujplig pov rau hauv ntujtawg.*” Nov yog koj yuavtsum paub ntshai Vajtswv vim koj yog tus tibneeg txhaum. Koj yuavtsum paub ntshai Vajtswv vim Vajtswv ntsub txojkev txhaum thiab nws yuav rau txim rau tus ua txhaum. Koj yuavtsum paub ntshai tus Vajtswv uas muaj hwjchim tuav txojkev tuag. **(Show Jesus conquered death)**



Txojmoozoo qhia haistias, peb yuavtsum tsis txhob ntshai vim Yexus Khetos twb kovyeej txojkev tuag lawm. Nws sawv ntawm txojkev tuag qhia tau tias tsis muaj ibyam dabtsi uas yuav tuav tau txojkev tuag. Yexus sawv ntawm txojkev tuag qhia tias tus uas ntseeg tseem muaj lub neej tomqab txojkev tuag. Los ntawm nws txojkev sawv peb yuav tsis tuag thiab raug cais mus rau ntujtawg teb tiamsis tau txojsia mus ibtxhis. Peb yuav tsis ntshai vim Yexus haistias, “...Because I live, you also will live – *Vim Kuv muaj sia nyob, koj yuav muaj siab nyob thiab.*” (Yauhas 14:19) **(Show death defeat)**



Tus thwjtim Paulus sau ntxiv qhia kom cov ntseeg Vajtswv tsis txhob ntshai txog txojkev tuag. Nws sau haistias, “I desire to depart and be with Christ, which is better by far – *Kuv xav ncaim thiab mus nrog Khetos nyob, vim hnov yuav zoo dua.*” (Filipis 1:23) “For to me to live is Christ, and to die is gain – *Yog rau ntawm kuv, ua lub neej nyob vim yog Khetos thiab kev tuag yog kev kovyeej.*” (Filipis 1:21) “Where, O death, is your victory? Where, O death, is your sting? – *Txojkev tuag, koj txojkev yeej nyob qhovtwg? Txojkev tuag, koj tej kev taug nyob qhov twg?*” (1 Kauleethaus 15:55)

- III. Ntev ntau lub xyoo dlhau los lawm, yog cov “coal miner – nhriav thee” yuav tsis mus rau hauv lub qhovtsua yog tsis muaj tus xub muaj kuaj uantej. **(Show mine inspector)**



Yuavtsum muaj ibtug mus uantej mus xyua saib puas muaj cov “methane gas – pas roj”. Txhua tagkig thaum sawv ntxov tus kuaj yuavtsum tuav nws lub teeb thiab mus rau hauv lub qhovtsua uas nyob tsau ntuj nti. Yog lub teeb tus nplaim pib cig ib ntsai ib ntsai ces qhia tau haistias muaj pas roj lawm thiab nws yuavtsum khiav ceev li khiav tau rov qab tawm los. Cov ua haujlwm nyob sab saud tos ntsoov tus kuaj tawm rov los qhia rau lawv saib muaj teebmeem losyog tsis muaj teebmeem. Lawv mus ua tau haujlwm losyog mus sis tau.

Nov zoo sishooj li peb tus Tswv Yexus Khetos. Nws zoo li tus ua twb mus kuaj ntujtawg teb thiab rov los qhia rau sawvdaws paub haistias, “txojkev tuag tsis muaj lawm. Nej yuav tsis tau mus rau ntujtawg teb tiamsis yuav tau mus saum ntuj ceebtsheej. Yog li ntawd tsis txhob ntshai txog txojkev tuag. (Where do the dead go?)



Peb Hmoob coob tus tseem ntseeg tias thaum yus tuag ces yog yus mus raws niam raws txiv qab rau tom ntuj txiag teb tsau. Thaum cov hluas nug haistias, “Ntuj txiag teb tsau yog zoo li cas?” Cov laus thiab cov tseem coj kevcai dabqhua qhia tsis tau. Lawv tsua haistias, cov menyuam uas tseem ua neej nyob yuavtsum tua tsiaj pub rau niam thiab txiv tau noj tau haus kom txaus niam thiab txiv thiaj li tsis rov los ua vij sub vij npog rau cov

menyuam tseem ua neej nyob. Cov hluas tiam tamsimno tsis totaub txog txojkev mus raws niam thiab txiv qab thiab tsis totaub txog txojkev tias thaum yus tuag no yus yuav mus rau qhovtwg tiag.

Cov kwvtij hlub thiab movtshua, peb ua Vajtswv tsaug uas Vajtswv txib nws tus Tub uas yog peb tus Cawmseej Tswv Yexus Khetos los cawm peb cov uas yog tibneeg txhaum rov muaj feem mus tau rau ntawm Vajtswv uas yog mus tau txojkia ibtxhis thiab ibtxhis. Yog li ntawd thaum peb tseem ua neej nyob peb tsis txhob ntshai txog txojkev tuag rau ntawm sab nqaijtawv. Vim ntawm sab ntsujplig peb twb tau txojkia mus ibtxhis los ntawm peb txojkev ntseeg Tswv Yexus Khetos. Yog li ntawd thaum peb ua neej nyob peb yog ua rau ntawm Vajtswv. (Show live or die we belong to the Lord)



Paulus thiaj li sau haistias, “If we live, we live to the Lord; and if we die, we die to the Lord. So, whether we live or die, we belong to the Lord – *Yog peb ua neej nyob, peb ua rau tus Tswv; thiab yog peb tuag, peb tuag rau tus Tswv. Txawm haistias peb ua neej nyob losyog peb tuag, peb yog tus Tswv tug.*” (Loos 14:8 ) Cia li nyob kajsiab lug nrog rau txojkev haumxeeb. Peb tsis muaj kev ntshai lawm vim peb twb kovyeej txojkev ntshai los ntawm peb tus Cawmseej Tswv Yexus Khetos. Asmees.

Thov kom Vajtswv Txojlus pub rau peb sawvdaws totaub thiab tau nyob kajsiab lug. Peb txhua tus uas yog Vajtswv cov menyuam peb sawvdaws hais: Asmees.